


U Sarajevu po vlastitom izboru



Paní Klára von Kriegsheim Kadlecová, zamjenica ambasadora Republike Češke u Bosni i Hercegovini, razgovarala je za Informator „Česke besede“ Sarajevo sa potpredsjednicom za kulturu Leonom Sabolek.

Paní Klára von Kriegsheim Kadlecová rođena je 1976.g. u Brnu. Osim u Brnu, školovala se u Americi, Italiji i Njemačkoj. Za karijeru joj je veoma važan bio College of Europe u Belgiji. Prvo je radila u privatnom sektoru, a kasnije u Institutu za međunarodne odnose Češke i u Razvojnoj agenciji Češke Republike. Napisala je formalnu strategiju razvojne saradnje Češke Republike i Bosne i Hercegovine za period od 2005. do 2010. godine. U Ministarstvu vanjskih poslova u Odjeljenju za Balkan, i dakako Bosnu i Hercegovinu, je od 2005. godine. Tu joj je šef bio ambasador Tomáš Szunyog. Zanimljivo je da je 19.10.2005.g., upravo na njen prvi radni dan u Ministarstvu, otvorena prva ambasada Bosne i Hercegovine u Češkoj Republici. Službovala je u Belgiji, u Londonu 4 godine, a sada je ovdje po vlastitom izboru.

U Sarajevo je stigla u augustu 2014.g. Vršila je poslove otpravnika do februara 2015.g. „ Bilo je naporno, ali korisno. Imala sam puno obaveza. Tada su se održavali i izbori u Bosni i Hercegovini. Bila sam sretna kada je došao novi ambasador “, kaže Klará.

U Bosni i Hercegovini je bila ranije sa roditeljima kao djevojčica. 1985.g. su imali saobraćajni udes i neplanirano su se zadržali radi popravke kola. Dolazila je tokom studija 2000. i 2001. godine u okviru razvojne saradnje, pa s nevladinim organizacijama i s Razvojnou agencijom Češke Republike. Samo u periodu od 2007. do



2014.g. nije poslom vezana uz Bosnu i Hercegovinu. Nekada davno je odsjela u Hotelu Garni Europe, a sada je to sve drugačije. Dosta se toga izgradilo, osobito komercijalnih prostora, ali još sve nije obnovljeno nakon rata. Zadnjih godina ne vidi da je kod nas došlo do nekih promjena.

Kao zamjenica ambasadora prati odnose u regiji. Osim političkih pitanja, portfoliji su joj još kultura, štampa i sunarodnjaci/krajani. U odsutnosti ambasadora vrši sve poslove predviđene za tu diplomatsku poziciju.



A šta paní Klará kaže o krajanima i njihovim udruženjima: „ Sretna sam da Češka Republika ima 7 udruženja u maloj državi kao što je Bosna i Hercegovina. To je 5 Českich beseda i 2 udruženja bosansko-češkog prijateljstva „ Snješka “ i „ Karlo Paržik “ iz Mostara i svi su aktivni. Sredstva iz donacije koju su dobili ove godine su visoka i nadam se da će biti realizirani predviđeni projekti. Organizacije i pojedinci u njima su vrlo zanimljivi. Šteta je što se u udruženjima ne govori češki.“

U Sarajevu je s Klarom i njena kćerka Mihaela – Miša koja ima 6 godina. Lijepo se snašla u Sarajevu i govori bhs jezik. Čak za sebe kaže da je Bosanka. Najesen kreće u školu i u prvom će razredu učiti na našem jeziku. Miša ide na balet, a upisala se i na folklor u KUD „ Baščaršija “. Paní Klará je također savladala naš jezik. Lijepo joj je u Sarajevu. Misli da ovdje njena obitelj vodi bogatiji kulturni život nego u Češkoj. Postoji veliki izbor kulturnih događanja i u Sarajevu je sve blizu. Od sportskih aktivnosti tu su skijanje, plivanje, trčanje i planinarenje. Kao veliki uspjeh smatra to što je 2015.g. istrčala Sarajevski polumaraton od 21km za 2 sata.



Na kraju paní Klára von Kriegsheim Kadlecová poručuje krajanima: „ Trebate nastaviti sa promocijom češke baštine i češkog jezika u Bosni i Hercegovini. Češki jezik je važan jer je znak češkog identiteta.“